

BULA "DUM LEVAMUS" DO APROVAÇÃO

DA ORDEM SERVOS DE SANTA MARIA DO PAPA BENITO XI

11 FEVEREIRO 1304

Texto en Latin

BENEDICTUS episcopus, servus servorum Dei. Dilectis filiis Generali et universis Prioribus et Fratibus Servorum Sancte Marie, Ordinis sancti Augustini, salutem et Apostolicam benedictionem.

DUM LEVAMUS in circuitu oculos nostros, et gregem dominicum Nobis, licet immeritis, divina dispositione commissum undique, iuxta pastoralis officii debitum, contemplamur, vigilem, quantum Nobis ex Alto permittitur, curam libenter impedimus, ut cultores vinee Domini Dei Sabaoth sic cultui salutis intendant quod eadem vinea palmites diffusos extendens, salutarium producat fructum ubertatem.

Et licet erga singulos cultores huiusmodi, personas videlicet ecclesiasticas, Apostolica sollicitudo versetur, erga tamen viros religiosos, qui contemplationi celestium, mundanis relegatis illecebris, pie vite studio sine intermissione desudant, eo propensioem nos decet diligentiam adhibere, quo ipsi pro religionis favore sunt amplius Apostolicis presidiiis confovendis.

Sane vos, qui Ordinem sancti Augustini, per Sedem Apostolicam approbatum, profitemini et servatis, ex devotionis affectu, quem geritis ad beatam Mariam Virgimen gloriosam, assumpsistis vobis vocabulum ab eadem, vos Servos eiusdem Virginis humiliter nominando, dictumque Ordinem sancti Augustini nichilominus iuxta pias et honestas institutiones vestre Regule, in honorem ipsius Virginis editas, laudibiliter servastis hactenus et servatis; ac vobis, per specialia privilegia, dicta Sedes indulget quod celebrare possitis Capitulum Generale, ac in eodem Capitulo Priorem vobis Generalem eligere, qui in fratres vestri Ordinis correctionem et alia, que ad suum spectant officium, libere valeat exercere; quodque ad sepulturam possitis recipere illos qui apud loca vestra elegerint sepeliri.

Ex quibus clare inspicientibus satis innuitur dictam vestram Regulam per eandem Sedem existere quodammodo confirmatam.

Nos autem, qui ad Virginem ipsam Dominam nostram libenter devotionem quam possumus exhibemus, nolentes quod aliquis contra vos, et regulam ipsam quicquam possit detractionis impingere, quin eadem Regula plenam habeat Apostolici muniminis firmitatem, ad omnem hesitationis materiam

circa hec de quorumvis animis amovenda, vestris supplicationibus inclinati, Regula et eius institutiones predictas expresse Auctoritate Apostolica confirmamus et etiam approbamus, et presentis scripti patrocinio communimus, eamque vobis concedimus, decernentes ipsam per vos fore perpetuis temporibus inviolabiliter observandam.

Nulli ergo omnino hominum liceat banc paginam nostre confirmationis, approbationis, concessionis et constitutionis infringere, vel ei, ausu temerario, contraire.

Si quis autem hoc attemptare presumpserit, indignationem Omnipotentis Dei, et beatorum Petri et Pauli apostolorum eius, se noverit incursurum.

Datum Laterani, III idus Februarii pontificatus Nostri anno primo